

ISUMALIUTISSIISUT

Ilaqtariinnermut Peqqissutsimullu Ataatsimiititaliap

Uunga siunnersuummut: Siusinaartumik pensionisiat pillugit Inatsisartut inatsisaata allannngortinneqarnera pillugu Inatsisartut inatsisaat nr. xx, xx. xxx 2020-imeersoq
Isumaginninnermut, Ilaqtariinnermut Inatsisinillu Atuutsitsinnermut Naalakkersuisumit saqqummiunneqartoq

siunnersuutip aappassaaneerpeqarneranut tunniussaa

Ataatsimiititaliap suliarinninnermini uku ilaasortarai:

Inatsisartunut ilaasortaq Malene Vahl Rasmussen, Demokraatit, siulittaasoq
Inatsisartunut ilaasortaq Mikivsuk Thomassen, Inuit Ataqtigiit, siulittaasup tullia
Inatsisartunut ilaasortaq Anders Olsen, Siumut
Inatsisartunut ilaasortaq Nikkulaat Jeremiassen, Siumut
Inatsisartunut ilaasortaq Bo Martinsen, Demokraatit
Inatsisartunut ilaasortaq Peter Olsen, suppleant, Inuit Ataqtigiit
Inatsisartunut ilaasortaq Stine Egede, Inuit Ataqtigiit

UKA2020-imi oktoberip aallaqqaataani siullermeerinninnerup kingorna siunnersuut ataatsimiititaliap misissorpaa.

1. Siunnersuutip imarisaa siunertaalu

Siusinaartumik pensionisiaqarneq pillugu maalaarutininik suliaqarsinnaanermut siusinaartumik pensionisiaqarnermut maalaaruteqartarfiup piginnaatinneqarneranik, aamma qulaajaanerit ingerlanneqarneranut kiisalu siusinaartumik pensionisianik qinnuteqarnermi piginnaanngorsaqqinnerup ingerlanneqartarnera pillugit siunnersuummi erseqqissarneqarpoq. Taama siunnersuuteqarnikkut innuttaasut siunissami sulilersinnaasut piginnaanngorsaqqinnissartik kinguartikkallarsinnaavaat, taamaaliornikkut innuttaasut piginnaanngorsaqqinnissartik aallartissinnaaneraat ingerlaavartumik nalilersorneqarsinnaaqullugu. Siunnersuut ulloq 1. januar 2021-imi atuutilersinneqarnissaa siunnersuutigineqarpoq.

2. Siunnersuutip Inatsisartunit siullermeerneqarnera

Siunnersuut partiinit amerlanerussuteqartunit tapersorneqarpoq. Siusinaartumik pensionisiat naatsorsorneqarneranni inooqatigisap/nuliaasup/uiusup isertitai naapertorlugit ilanngaavigineqarsinnaanerat aammalu siusinaartumik pensionisiaqalerniarluni qinnuteqarnermi sullissinermut piffissaq atorneqartartup sivisuallaarnera partiit ataasiakkaat ernumassutigalugu oqaatigaat, taamaattumik inatsisip allanngortinneqarnissaa pisariaqarsorinarluni, taamaaliornikkut siusinaartumik pensionisiaqalernissamik akuerineqartoq ullormi qinnuteqarfigisaminiit naatsorsorneqarsinnaalersinnaaqullugit.

3. Tusarniaanermi akissuteqaat

Tusarniaanermi akissuteqaatit tunniunneqartut inatsisissatut siunnersuummut ilanngunneqarput, tamannalu Inatsisartut siulittaasoqarfiata piumasqaataanut naapertuuppoq.

Siusinaartumik pensionisiat pillugit inatsimmi atuuttumi¹ §§-inut 15, 16, 17 aamma 31-imut naapertuuttunik Tilioq akissuteqarsimasoq Ilaqutariinnermut Peqqissutsimullu Ataatsimiititaliamit maluginiarneqarpoq. Tassani pineqarput innuttaasut innarluutillit sulisinnaangitsut aapparisaq isertitai kisiisa isumalluutigilersinnaammattigit. Kiisalu kommunalbestyrelsip akuersissuteqarneranit aatsaat qaammatip ataatsip qaangiunneratigit siusinaartumik pensioninik tunineqarnissamat pisinnaatitaaffiup atuutlernissaa aammalu minnerunngitsumik sullissinerup pisariaqanngitsumik sivisuallaarnera uparuarneqarlutik.

Kommuninut tusarniaanermi akissuteqaatit tunngavigalugit pisariaqartitsineq naapertorlugu Naalakkersuisut ilaatigut allannguutininik ilanngussimasut ataatsimiititaliamit maluginiarneqarpoq.

4. Apeqquteqaat

Isumaginninnermut, Ilaqutariinnermut Inatsisinillu Atuutsitsinnermut Naalakkersuisoq apeqqutigineqartunut arlalinnut akissuteqassasoq ataatsimiititaliap siunnersuummik suliaqarnermini atugassaanik ataatsimiititaliaq qinnuteqarpoq. Ataatsimiititaliap apeqquteqaataasa aamma Isumaginninnermut, Ilaqutariinnermut Inatsisinillu Atuutsitsinnermut Naalakkersuisup akissuteqaataasa assilineqarneri isumaliutissiissummut matumunnga ilanngussaq 1-itut ilanngunneqarput. Ataatsimiititaliap Naalakkersuisoq qinnuigivaa innuttaasut sorliit siunissami sulisinnaassusiat ineriartortinneqarsinnaanersut itisileeqqullugu.

5. Ataatsimiititaliap siunnersuummik suliarinninnera

Isumaginninnermut maalaaruteqartarfimmi aamma Siusinaartumik Pensionisiat pillugit

¹ Siusinaartumik pensionisiat pillugit Inatsisartut inatsisaat nr 40, 9.dec-meersoq, Inatsisartut inatsisaanni nr. 28, 28. nov. 2019-imi allanngortinneqartoq

maalaaruteqartarfimmi naammagittaalliuutinik suliaqarnermi akisussaaffiit agguataarneqarnerat pillugu tusarniaaffigineqartut ilaasa siunnersuutip nalornilersitsisimanagera siullertut Ilaqutariinnermut Peqqissutsimullu Ataatsimiititaliamit maluginiarneqarpoq. Tamatumunnga atatillugu inatsimmi allanngineq aamma atuutsinneqarnera pillugu paasissutissat peqqissaartumik atuaruminartumillu suliarineqartarnissaat Naalakkersuisut qulakkiissagaat ataatsimiititaliamit kaammattuutigineqarpoq.

Innuttaasut sukkanerusumik sullinneqartalernissaannut siunnersuutip nukittorsaataanissaa naatsorsuutigineqartoq ataatsimiititaliamit paasineqarpoq, erseqqissaatigissalluguli kommuninik suleqateqarnermi suleriaatsip ataavartumik malinnaaffigineqassasoq. Kiisalu paasinnittaatsimut ingerlatsinermullu tunngasutigut, soorlu, sullissinerit arriippallaartut aamma siusinaartumik pensionit amerlassusilerneqartarnerisa aalajangiivigineqartarneranik ajornartorsiutit ilaatigut tusarniaanermi akissuteqaatini atuarneqarsinnaasut aammalu siullermeerinninnermi oqaatigineqartut Naalakkersuisut kommunit suleqatigalugit eqqumaffigissagaat.

Inatsisip allanngortinneqarnerani kommunalbestyrelsi qulaajaanarit aallartinneqarnissaannik kiisalu inunnut ataasiakkaanut naleqqussakkanik piginnaanngorsaqqiinernut akuersissutinik inatsit aqqutigalugu annertuumik akisussaaffilerneqassasut ataatsimiititaliamit oqaatigineqassaaq. Suliani assersuutigalugu nakorsamit/peqqissutsikkut tunngasutigut misissorneqarnissamik pisariaqartitsisoqartillugu peqqinnissaqarfimmik suleqateqarnissamut periarfissap atuuttup tamakkiisumik atorluarneqarnissaa Naalakkersuisumit qulakkeerneqassasoq ataatsimiititaliamit kaammattuutigineqassaaq, taamaaliornikkut piginnaanngorsaqqinnissamut suliassat pisariaqanngitsumik misissuinerit utaqqisitsinnginniassammata. Pingaartumik piginnaanngorsaqqinnissamut kinguartitsisimasunut ukiup ataatsip qaangiunnerani nutaamik naliliivigineqatigittussanut tunngatillugu. Piginnaanngorsaqqinnerit sungiusaqqinnerillu pillugit suliniutit katsorsaanerillu ataatsikkut ingerlanneqarnissaat pisariaqarsinnaammata kiisalu innuttaasut arlalinnit nalilerneqartarnissaat pisariaqartoq ataatsimiititaliamit ilanngullugu erseqqissaatigineqarpoq.

Qulaajaanernut piginnaanngorsaqqinnernullu takkutinnitsoornerni peqataannitsoornernilu kinguneqartitsisarneq pillugu malittarisassiornissamut Naalakkersuisut piginnaatitaanerit ilanngullugu ataatsimiititaliamit maluginiarneqarpoq. Ataatsimiititaliap naliliinera naapertorlugi takkutinnitsoornerit peqataannitsoornerillu assigiinngitsorpassuarnik peqquteqarsinnaasut taamaattumillu tamakku qulaajarneqarnissaannut peqqissaartumik malittarisassiortoqarnissaa kaammattuutigineqarpoq. Qinnuteqartup suliap ingerlanneqarnerani suleqataasariaqartoq suliallu namminerminut tunngasut akisussaaffigigai naatsorsuutigineqartoq ataatsimiititaliaq isumaqarpoq. Qinnuteqartumut erseqqissumik nassuiaatigineqarnissaa ataatsimiititaliap kaammattuutigaa. Innuttaasut qulaajaaffigineqarnerminni/piginnaanngorsaqqinnermilu sapinngisamik annertunerpaamik

sunniuteqaqataanissaat aammalu sumiluunniit najugaqaralarunik kommuneqaralarunilluunniit sulileqqinnissamut periarfissat atugassarititaasullu pitsaasumik qulakkeerneqarnissaat naggataatigut ataatsimiititaliamit kaammattuutigineqassaaq.

Siusinaartumik pensionisiat pillugit inatsisip siunissami nutarterneqarnissaani ilisimatinneqartarnissaq annertuumik kissatigineqarmat ataatsimiititaliamit matumuuna oqaatigineqassaaq.

6. Siunnersuutip aningaasatigut kingunerisassai

Siunnersuummut nalinginnaasumik oqaaseqaatinik allassimavoq, siunnersuutip atuutilersinneqarnerani aningaasatigut kinguneqartitsisoqassanngitsoq. Tamanna tunngavigalugu allatut naliliinissamik ataatsimiititaliamit tunngavissaqartinneqanngilaq.

7. Ataatsimiititaliap inassuteqaatai

- Ataatsimiititaliap isumaqatigiittup siunnersuutip akuerineqarnissaa inassutigaa

Siusinaartumik pensionisiat pillugit inatsisip siunissami nalilersuisarnissani siusinaartumik pensionisiat inaarutaasumik naatsorsorneqarneranni inooqatigisap/nuliaasup/uiusup isertitaat ilanngunneqartannginnissaat qulakkeerneqarnissaa ataatsimiititaliamit Naalakkersuisut **kaammattorneqarput**, siusinaartumillu pensionisiaqalersinnaanermut pisinnaatitaaffeqarneq ullormi qinnuteqarfiusumiit naatsorsorneqartassasoq siusinaartumillu pensionisiaqalernissaq pillugu kommunalbestyrelsip qanga aalajangiisimanera aallaavigineqartassanngitsoq **kaammattuutigalugu**.

Siusinaartumik pensionisiat pillugit inatsisip siunissami nalilersorneqartarnissaani ataatsimiititaliap kissaatigisorujussuullugu taamaalilluni oqaatigaa.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.



Malene Vahl Ramussen
Siulittaasoq




Mikivuk Thomassen
Siulittaasup tullia



Nikkulaat Jeremiassen



Anders Olsen



Bo Martinsen



Stine Egede



Peter Olsen, suppleant



Isumaginninnermut Ilaqutariinnermut
Inatsisinillu Atuutsitsinnermut Naalakkersuisoq
ian@ina.gl

Ulloq: 09-10-2020

J.nr.: 01.38.01.03-00130

EM2020/187-mut tunngatillugu allakkatigut apeqquteqaat

Ilaqutariinnermut Peqqissutsimullu Ataatsimiititaliap immikkoortup 187-p ataatsimiititaliamit suliarineranut atatillugu Isumaginninnermut, Ilaqutariinnermut Inatsisinillu Atuutsitsinnermut Naalakkersuisoq allakkatsigut imaattumik apeqquteqarfiginiaarpaa.

- §9-mi, imm. 2 allanngortinneqarneranut atatillugu ima allassimasoqarpoq: "Inummut ataatsimut naleqqussakkamik piginnaangorsaqqinnissamik ingerlatsineq aqutigalugu sulisinnaassuseq massakkuugallartoq ineriartortinneqarsinnaangitsoq kommunalbestyrelsip nalilerpagu, taava paasissutissat tigummineqareersut tunngavigalugit piginnaangorsaqqinnermik ingerlatsinerup kinguartinneqarnissaa aamma siusinaartumik pensionisiaqartitsinissaq pillugu kommunalbestyrelse aalajangiissaaq. Piginnaangorsaqqinnermik ingerlatsinissap kinguartinneqarnissaa pillugu aalajangiinerup kingorna, kingusinnerpaamik ukiup 1-p qaangiunnerani, kommunalbestyrelsip suliaq nalilersoqqissavaa".

Siunissami innuttaasut ilaat sulisinnaassusiat ineriartortinneqarnissaannut periarfissaqartoq innuttaasullu taakku piginnaangorsaqqinissaat kinguartikkallarnejarnissaanut periarfissaqartoq immikkoortup siullermeernejarnerani Naalakkersuisut saqqummiussissumminni oqaatigaat.

Innuttaasut kikkut pineqarnersut itisiliiffiginissaa, innuttaasut sunik unammilligasaqarnersut pillugu naatsumik ilisimatitsisoqarnissaa aamma sulianik imaattunik Naalakkersuisut assersuuteqarsinnaanersut Ilaqutariinnermut Peqqissutsimullu Ataatsimiititaliamit kissaatigineqarpoq.

Inussiarnersumik inuulluaqqusillunga

Ilaqutariinnermut Peqqissutsimullu Ataatsimiititaliaq sinnerlugu

Siulittaasoq

Malene Vahl Rasmussen



Ilaqutariinnermut Peqqissutsimullu Ataatsimiititaliaq

EM2020/187 pillugu allakkatigut apeqqutinik akissuteqarneq

19-10-2020
Suliaq nr. 2020 - 555
All. id. 15084826

Matumuuna Ilaqutariinnermut Peqqissutsimullu Ataatsimiititaliaq siunnersuummi § 9, imm. 2-mi inuit pineqartut pillugit naatsumik paasissutissiiffiqineqarnissamik kissaatigisaa akissuteqarfigineqarpoq.

Postboks 260
3900 Nuuk
Oqa. (+299) 34 50 00
Nassitsigasuaat(+299) 34 66 66
E-mail: lian@nanoq.gl
www.naalakkersuisut.gl

Siunnersuummi § 9, imm. 2-mi inuit pineqartut aamma atuuttumi § 9, imm. 1-imi pineqartut assigaat.

Inuit pineqartut tassaapput atornerluinermik, sivisuumik suliffeqarfeqarfimmiissimannginnermik, anigorsinnaangisamik anniaateqarnermik imaluunniit inuit allatigut suliffeqarfeqarfimmut aalajaatsumik attaveqarsinnaannginnermik peqquteqarlutik suliffeqarnissamat piareersimanngitsut.

Inuit piffissaq ungasinnerusoq eqqarsaatigalugu sulisinnaanissamat piginnaaneqalersussat aalajangersakkami pineqarput. Assersuutigalugu siullermik inuk piffissaq eqqorlugu suliarorsinnaanermut ikiorneqaruni, atornerluinermik qaangiinialuni ikiorneqaruni imaluunniit peqqissutsini tigoqqikkuniuk il.il. Inuk assersuutigalugu atornerluinermik qaangiiguni suliffimmillu nakkutiginnissinnaalerluni, taava sulisinnaanera ineriartortinneqaratarsinnaavoq.

Assersuut:

Qinnuteqartoq ataavartumik annikillimasumik sulisinnaassuseqarpoq ilutigalugulu atornerluisuuvoq.

Qinnuteqartoq pitsaaneruseqarnissamik ineriartortitsinnaasutut nalilerneqarpoq, atornerluinera katsorsarneqarpat. Piffissaq naleqquttoq qaangiuppatt qinnuteqartoq attavigineqassaaq, atornerluinera katsorsarneqareersutut nalilerneqarpat.

Taassuma kingorna piginnaanngorsaaneq nanginneqassaaq.

Katsorsartinnerup nalaani siusinaartumik pensionisiaqarnissaaq akuerisaavoq, piumasaqaatit sinneri eqqortinneqarmata.

Katsorsarneqarnerup naammassereernerata kingorna suliaq nalilersoqqinneqassaaq massakkullu sulisinnaassuseq aallaavigalugu siusinaartumik pensionisiaqarneq akuersissutigineqassaaq.

Kommunit inunnik pinngitsaaliillutik kinguneqarpasinngitsumik
piginnaangorsaaqqinnissaat pinngitsoorniarlugu aalajangersagaq ilanngunneqarpoq.

Pisuni piginnaangorsaaqqiineq kinguneqarsinnaanngitsutut nalilerneqartuni,
qinnuteqartoq assersuutigalugu makissinnaangornissaanut aalajaatsumillu
sulisalernissaanut ikiuinissamik kommune taarsiullugu iliuuseqarnissanik
aallartitsisariaqarpoq imaluunniit iliuuseqarnernik aallartitsilluni innuttaasullu
atornerluineranit qaangiinissamut ikiuutaasinnaasunik katsorsaanermik
neqerooruteqarluni.

Atornerluinermut peqqissarneqarnerup naammassereerneratigut erserpat sulisinnaaneq
ima annertutigilersimasoq allaat siusinaartumik pensionisiaqalernissamut piumasaqaatit
atorunnaartut, taava siusinaartumik pensionisiaqarnermut akuersissut
unitsinneqassaaq, kisianni tamanna immikkut ittuulluinnartariaqarpoq, atornerluineq,
eqiasunneq il.il. namminermikkut siusinaartumik pensionisiaqalernissamut
tunngaviusutut isigineqangimmata.

Inussiarnersumik inuulluaqqusillunga


Martha Abelsen